

Kotavaxak dem suterot

Ivan Vazov

BALGARIKYA

Berpotam (1899)

Kotava, tela tamefa golerava

KOTAVAXAK DEM SUTEROT

Ivan Vazov
BALGARIKYA

Balgaravafberpotam (1899)

Kalkotavaks : **Sabrina Benkelloun** (2016)

I. Mincov Vazov : balgarafsuterotik (1850-1921)

I

Darekeon. Ba 20^e ke alubeaksat ke 1876, bak rielcek ke viel viele lospa ke Botev koe Balkan Meftava gan Tcerkes blay stan gan forteyfamaf Djambalast zo kalvilar isen miv Botev awalkolon bakanon luber, belca dem ayikya moe taltefa omega ke Iskar kuksa tigur. Kottan ker vieli ko Lyutibrod keve bana omega kan tiv silukon di zo remburer. Lotanya va anameon dilizes bifeem me vofayad isen letan vetcoyensed. Durefa milkafa remlanira kaik Vratsa kuksa ixam jijasa mali tolka va sina gubrunar ise me tatcer da sina va exomol torled. Tire, anton ayikya batlize belcanon tigid kiren ayikye va int vol lanedid. Kore gejaxo ke vintesikeem is Tcerkes blayeem ile Lyutibrod tigur, lorara ke batyona koznara batliz al kostir, numen eaftuca va widikyeeem gazar.

Revielon turkaf sayakik, vangitison va tubizik is playeson va anamsusik poke bost ta enintera va remlapisik, va wida al kolanid. Viele bata nega tozuwer, tiv keve bana omega tigur numen tawadayikya va dimlapira larveson ked. Witka adim domur isen kujik, i ayik ke Lyutibrod detctiur enide va tiv kev omega di vanplekur.

— Abdulanic, ayikya !! Ampuc !!

Laizon toloy turkaf okolbatultik ke Tcelopek tcepson artlakid. Mo sid oriwon grabled aze kallanitison va piv va ayik nokied. Tel loklaaf, i pwertaf turkik, vogadason ustermitar.

— Mallanic, zolkevik !! Griawic !!

Kovudana ayikya dimelanid, gonokepeson.

— Mallanic, xay, diwedikaj !! ~ ban turkik buzegar, rontion vanlanison is ustermitason.

Vudeson kizoyuson yategarsad.

Batedje kujik va okol ko tiv inker, azen toloy batultik va witka boroded.

Pwertaf turkik pu kujik riyomeson iegar :

— Mekbata vakolya do cin rundanyar !! Ilon !! Mallanic !! ~ dratceson eviegar.

Tueaftana ayikya dimavlad aze djukudimlanid.

— Vay fayik !! Vosé, va jin kel !! ~ ilgaleesa tawadayikya ampuson vanvultesa mal Tcelopek rozar.

Batultik rwoded.

— Va tokcoba djumel, guazik ? ~ pwertaf turkik puskacegar.

Artlanisik tir tevsandikya, ontinafa is rodafa, ton ayikyefa laniga. Moe ma va velik koe guazafu modivatcesiku gir.

— Novel da di remlapí, fayik !? Iskel da ko tiv rundanyá, vay !! Lorik va rin gableter ise va galera pu rinaf nazbeikeem zilitir.

— Ax, rin, Iliitsa ! Ax, oviskaf zolkevik !

In kagruper kiren va yona estura koe Tcelopek al zanivar.

— Gue, jin, Aga Xadji Xasan ! Va jin divstal, mu velik !!

— Tokliz va famikaj burel ?

— To veynazbeik tir, Xadji. Gadikya awalkeyer, in akoleper... Ko tucpastaxe buré.

— Ta toka askira ?

— Enide va fraskesa blikera di erú ! ~ ayikya dem polepes iteem vidgur.

Hadji Xasan va int kodebackar, azen kujik va detc madar.

— Aga, mu Lorik, batinde teginyil !! Trakul da dere rin va nazbeik dikil ! Mu in is rin bliketé !

Turkik undemer aze vliguson iegar :

— Tetce, rundanyal, astolaj !!

Ayikya ko tiv iper aze pok kujik rundanyar. In va totama mo skaltafa ora ke Iskar platir, i ke kuksa kaldeeyena gan noeltafa muvarapa. Awalt titstis mo pistafa vokliba va lavek gu awalkeyesa olya tumoavar.

II

Kimtikya va tucpastaxe djukurartlanir. Koe meem veynazbeik akoles mali aksatacku ilblir. Mali sanalubka inaf sok dun turotawer, mecoba kiazar, al rokiazar, mei wayot ke guazy, mei nyokara. Dace niskadimplatisik meinde al greler, neken gertik ke wida al bliker, kevaykason va nubeem gu velik, voxen mecoba al tegickir ! Inafa bocafo pokolera denu

TumtaKetya tigr.

— Ko tucpastaxe golani !! Tucpastik mu in goblied !!
~ widyanya tolkaliiid.

Viele ina gazdon va velik al kodisuker, pune al zo kovudapar. In nutir awalkeyes.

— Ampul !! Kalion mallani !! Ant Tumtaketya va rin ropomar !

Numen, nekev zivotcara, al mallanir enide va Tumtaketya Tucpastaxe koe Tcerepets kaliapon artlanitir.

Viele va aalxo divlizeso moe krimpa van Iskar kolanir, yikye dem abigaf vageem, kabduon levgon gepoyter. Keve ast dem toloya ema ke agantak... is zelt koe nuba, ton paokaf is apkanaf lesay.

— Ayya, va beg !! Aelawalké ! ~ sukegar, oblason va kelda.

Ina va man tis korik vere diepiler. To tan laitenik tir !

— Lorikap ! ~ kovudanon prejar.

Ko eyelt suxar voxe vofar da va divburera va beg ampuyuson al vulkur. Va abic olgaf mit anton trasir aze zilir.

— Ayya, kas va int ko bata wida ropreyutá ?

Preyutara ko Tcelopek ! In fure co zo kosmatar, ise co zo ranketer... loeke golde inaf vageem.

— Mekase, nazbeye ! Mekase ! ~ ina dulzavar, forendeson

disukeson va inafa piskepasa gexata.

Undemeyeson, loplekur :

— Batlize va int preyutal, nazbeye !! Metan va rin witir. Remielon, va jin kel !!... Batliz dimtrasití ! Va beg fu vanburé, is va ar vageeem kiren va int batinde me ronedil... Kot tit kristevik.

— Batlize keté, va gadya... lanil !! Va rin grewá.

Ina va in etepeson mallanis az griawis ko danca wir. Inaf iteem koikuzawer. Ampuson, ina unt kalir :

— Va bata tegiranya gokotaskí... man kintik ! Maneke sivejer ! Lorik va jin rotir gableter nume va velik giwatar. Tumtaketya, va jin pomal enide va tucpastaxe di artlaní !! Lorik va bat kintik nendal, i va to balgarik !! In mu tela lazavanya va int wetar... i mu minafa kristevafa folixa...

Ina koeravar da va okilik ke tucpastaxe fu kobirgar, i va sodaf guazik, i va vonaf is laspedaf balgarik. Bantel va tawadayaf vageeem tori vintesik pu ina co bulkatar, azen moi kotgrupera va blikera mu velik, pune co amputur ise co mallanitor enide va kimtaf yatesik co di kevlanitor.

Dem warzafo po ampur, i wesidafa gu giwara va toloy ayikany.

III

Miel va italk mo Tcerepets tucpastaxe ixam al divatcer.

Krijaf amlit koe ecor ke Iskar azenter. Leve orikaf kelt, ton kivasa jaftoldunoliera, kuksa va aludevafa lava tanamer aze ko xadafa stoya wal guraf pist kaldrasuwer. Moe bana omega, branafa ontinafa dzeta ton ebeltafa izga ranyed, dem tapedafa arula is veyado ilbodeyeno koe rapor isu talgukay lize antiaf kiiz moe vokliba begamud.

Diliodafe tucpastaxe ludevon ice mielaf amlit tir. Pomas ravesik do vageenjaf is lebatakaf tucpastik flider.

— Ivan, toktan va tuvel tazer ? ~ tucpastik kivason diviegar.

Tawukafa ilavama keve rebava tigriz liz gem ke tucpastik al zo mimar.

Ware jontika tazera.

— Gelbesik ape tir... va tokcoba gonaskit?... Jupal da me kolanir !! Isen uxon viele okilik tir gracaf !... Kel, kel !! Abdion erul !!

— Toktan batlize tigriz ? ~ pomas ravesik kalterektason erur. ~ Puda ke ayikya cwe tir...

— Ayikya ! Ba man bartiv ! Klokel ! To sin tid ! Oken to turkik... en, arse, to turkik tid ! Va kot min fu staked ! Va tokcoba den min rotaneyad ? Va mecoba batlize digit... isen sovewá da tubizik va cinafa tumtafa ditsa kolanid. Lorik, va min saal !!

Puda keve tuvel loeke karakter.

— To ayikya rozar ! ~ pomas ravesik tolkalir. ~ Toktan til ?

— To jin, Iliitsa, ke Tcelopek, Ivan ! Ox ! Fenkul, kle fenkul !!

— Kas til antaf ? ~ Ivan dakir.

— Antaf do veynazbeik, Ivan.

— Lanel da batcoba me tir tsabura ! ~ Evtimi gertik sukegar.

Pomas ravesik va boytama madar. Rabateson, lion dam novenon gan orika, da to ayikya en tir, Evtimi gertik va fenkura granser.

Ivan va tuvel fenkumur, tawadayikya anjer azen gamiafi tuveli vere kaluber.

— Gan oretlik zo divstal !! Va tokcoba batliz askil, Iliitsa ? ~ zides gertik erur.

— Veynazbeik akoleper... toklize okilik ke tucpastaxe tigr ?

— Koe Berkovitsa tigr. Va tokcoba ke in djumel ?

— Kuraní da mu veynazbeik bliker... voxe vere. Gertye, muon blikel !!

— Voxe mielon ? Tokkane va rinaf akoles velik ropomá ? ~ zunen tucpastik puskacegar.

— Rin me ropomal, voxen Lorik va kotcoba sorotir !

— Acke, fu kenibel. Eldeon...

— Eldeon ! Toktan gruper dacoba eldeon titir... Velik roterser ! Akola someker... Ant Lorik va cin ropomar ! Lidroe

dodecketé...

— Til oviskaf ! Stegeval da isti mielcek fenkuv... enide vintesik rokolanid... numen turkik va min fu onsed nume batliz di torsad !

Bulegason is breneson, tucpastik va intafa sogza kolanir aze gemkiron dimlanir.

— Tetce, pil !!

Ina ko uja kadimelanir. In va tsoka vanteyar aze va migavenday kavager aze va blikerak konubar.

— Va akoles velik vanplekul !!

Iliitsa va velik van afi vanplekur. Inafa gexata tir batakafa dum sebeka.

— Voxen in mea blir ! ~ tucpastik diviegar.

Voxen zibuson, suxaf iteem vion fenkuwer, numen nope miavesi afi ke tczasa tsoka, olkoy dum bitej toz jebed.

Tucpastik va vrendayki mo taka ke velik aykar, aze kerujon negayason va frasketesa blikera, kevon gamdasugdar, aze va blikerak dimbuder. Tawadayikya va nuba ke tucpastik kutcar aze va tollumaf talolk fargier.

— Ede in gonoblir, pune griakoleter ! Re valem glesta senyal !!

Tucpastik va illanisa bora askir.

— Evtimi gertye, kemel !!... ayikya klabuson rozar.

In levgon rwoder aze vanlanir.

— Tokcoba ware tir ?

Ina pudomason kalir :

— Va koncoba gonodiá... kas kot min me tit kristevik... ?

Tucpastik bralder.

— Va tokcoba pu jin djumodial ? Tok kristevik ? Re fu kenibel !! Vol isket da tsoka anteyawer... kontan va afi divuon co rowir nume meganenon batliz co rokolanir...

Tucpastik va « vintesik » sugdalar voxen ayikya me zo coer. Gorestafa abdikerelera keve gexata lingewer, isen inafa puda toz skotcer.

— Va mecoba kival !! Metan djukukolanir...

Aze bulaskon is pudomason ina loplekur :

— Viele va wida divlaniyí, banlize koe aalxo...

Vuda is zide keve plozkiraf lesay ke tucpastik goatewed. In gildar da ayikya va wupesipis uum fu dokalir, nume levgon waljoar :

— Va mecoba djugildé... vol kalil !! Va intaf grupeks unt sul !! Kas tazdatason va kot min batliz al lanil ?

Tawadayikya djukaraker, voxen lente bata ilikatcura ewa bene kutc zertud. Ton piksesa zatca va tucpastik ko kusk

kadimlanir.

— Voxen batlize mielon me tiskí ! ~ pumbar, wison da van glesta zo star.

In akoydanon kodisuker.

— Va tokcoba ?

— Mallaní, vere...

— Til oviskaf !

— Oviskaf ok me... xabe... Mallaní ! Eldeon gazdon, lag va jin ked. Va beg zilil !! Aelé.

— Va beg, liote djumel ! Ivan fu zilir. Voxen va fenkura va tuvel pou !

Evtimi gertik under.

Fenkura va tuvel... batcoba wupesickir... ikorik rokolanitid... Toktan va kot rotis daneks gruper ?...

Voxen in unt trakur da ayikya batlize ixam tigur ise va koxakara kal sin rovanstar... ede turkik zo abred... me, ina vode gomallanir...

— Kle, mallanil, bam ! ~ in iegar.

Ayikya va beg sotcen gan Ivan kirepton konarir, anamatceson va velik kan ma, aze malvulter. Gamiaf tuvel moion kaluber azen marna tolon dwer.

IV

Koe amlitaf miel, Iliitsa guazya va Iskar vanlanir lize « vintesik » ker. Ina tir perzapafa is bizakafa merovegreledayason va tucpastik kazawayas ika vonaf gertokilik. Ticlaniyison va ontinaf dom ke kiria, va ecor wallanir, kadimlanison va binka kene kelda. Bitejkiraf miel nover da ina va guraf pist solwir, i va pist afizon orikon madawes vox re kotraf gu bulafa kovudara. Ton gloga dem kivarapa is iteem kotraf gu mielafa cora, kotcoba lenteon va dratcesa kerdela narir, numen artlanison va ontinuk, ina puskena mo fentafa tawa valeve naviulapa ins luber.

Kot blisik frofas va meftava kenibed. Tawadayaf amlit ke govitafa tuwava tir granaf isen ant kuksa koe aludevuca valeve ticuk ke rebavega is kepaiteem ke tucpastaxo iste orika odjon skaelur. Sumuon, mone Lyutibrod, vakol ieped. Guazya madagir voxe vol djuporemlanison va wida, va krimpa ke pist ronon anamelanir aze roykar.

Kev Iskar fure artlanir. Tiv keve omega sespawer. Tazemeson va wico lize kujik gikeniber, kemer. Voxen metan di dulzer. Ape battel mielon al vol djupozavzagir. Ina kovudana is guyafa va gonaskina coba me grupecker, aze va tiv vanlanir. Iskar yatkon lembiegar isen nekev orika ina va tcaza ke iyeptasa ora rosolwir. Eaftucarsa va ina vangir. Va tokcoba ina rotaskir ? Kas kali gazda di gozavzagir ? Va bata trakura vol doster, kore dank ke wilye va diref vananfiz dakted.

Va tokcoba battode rotaskir ? Kas mo ora anton rostuvur ?

Va nubara va vingo jontikviele al wir, voxen bancoba co tir

stuvaca kotrafa gu wupe ! Wori va narara me dadir ede va vintesik banlize kes is aelawalkes is guyursus di djukatrasir ! Iliitsa va velik mo bixe daykar. Ba bata ilamafa vula, dwirsinon va in mea trakur, aze kirepton xowason, va roda kagisa va tiv bene ayezok lagiliksantur. Gan skotcera zo vangir. Roda me tir vaniksantuyuna vols demiyina is budeyena kan zolap ! Batcoba arse tir askira ke turkik, tatceteson va kota birgotafa remlapisa sugara. Ina skotcesa zavzar mezekasa, ton takra kotrafa gu bemuuca.

Dank ke wilye koe Lyutibrod jonkawed. Kelt toz lukoptawemer. Arti tanoy bartiv afiz fu dur... Ina ve buwejer. Jonsanon va po, va zol lasugarber ike va rova lasujoar. Voxen mecoba empower. Ina lulana is divviavana pikseson tutritawer. Azon bareon omagison, va ayezok konubar aze lasudivtawar. Voxen in aludevon kosidayan vol widlar. Dure lasugaskison, meem anteyan gan awalt tutritawer, relteem atcewer aze tuazakawer, niskeem twawer isen fentafa furovera tit inafa kranavesa gexata kevtraspur. Ina cepitesa is tisa arte po, badieson dumede leve porn ke intavaj co tigur, gaeloyemer aze kan warzafa fa is ilamafa sugara, va ayezok divsidatason kotliz lagimpadar. Inaf ast roidar isen nugeem kal mewaya ko abdafе bixe vanludevawer. Arti kaikayafa sugara bak bartivacku, ayezok di widlar isen tawa anameon tunuligawer... bocafa botcera numen ina va nuk tere lajudivsidar.

Rova koe amlit ke miel odjon lorar, azen kiazanon repaleson, Iliitsa puskerseyena mo bixe ins luber. Vanion, tiv moe ebeltafa ora totar, vanbureson va guazafa Iliitsa do velik is rova is ayezok.

V

Iskar kuksa, batlize, va vwepaf ecor divvawar aze ton mantafa ploda divtraspur aze wale omaf domegeem kalion wan ilnir. Witka va kuksa katitnir, mevegeson va bagaliskafa detcera ke guazafa tawadayya, num welvepeson kaiknison va volrundanyaxo. Iliitsa va bata illapiyina domega lasutaruter. Lopofa rustxa va witka adim van bana domega malplatir, azen arti lyumarapa guazya va siday tere lajupafodar. Grableyeson mo domega, dem velik koe meem, va aalxo ampuson kolanir. Vanlanison va xo lize va vintesik al kakever, va ayizga anjesa ko danca wir, nume va koaneyanik vere pilkomodar. Yikye va ina lentlanir.

— Mielkiavá. Naryl !! Tori rin.

Ina va beg sotcer, mepebuson.

— Gadya, grewá ! ~ in burdon dulzer.

— Kemel, va batcoba vagel !!

Ina va vage zanudayase va velik dear.

— Va ine mal tucpastaxo al divburé... Lorik va jin faler !! Al trobá.

Iliitsa va bate vage al dimrumkar, folison da ine tir ke kwik, voxen viele yik kavager, pune gevanon vofar da ine tir arajda ke tucpastik.

— Xabe, sickí, isen batcoba tuidular ! ~ in karavaldar, va int

fentolon anamplekuson ko baynagem. Sin belcon gozad.

Vintesik va beg estur ise stivawer, impadimason va nimat is fenttcoteson. Tir yikyé, mon tolsandafe, mazdafe is ontinafe. Keckeson enide ine griaeler, guazyá mekon biber, voxe golde tere rilitucarsa, erur lizu ine al artlanir. Bam pwader da, griuziason va intafi rumalaki koe centaxo koe Veslets, xuyavon al eglur aze nekev iyelapa is taniafa cubera kal aalxo va int al impadimar. Mali to tolka va mecoba al estur, remi toloy afizcek isu mielcek, ciundayane gan lanira is terigera, dem nugeem waneyen, is vozepese. Va meftava djukurartlanir, djupokevlanison va yon xakes dositik pomatas va gelbera.

— Voxen, mea rodelanil, nazbeye ! ~ guazyá pumbar. ~ Va zelt deal... !! batcoba kiazatar.

Kan taltenuba, va ervo tiolter, edje kan ronema va velik burer.

— Tetce, sugamal, nazbeye... !!

— Voxen, tokliz rolaní, gadya ?

— Kle tokliz ?! Tire denon... den jin !

— En, edeen ? Gadya, ox gadya, grewapá !

— Kottan dure kovudapanon re blir... Ede va batcoba co raver, pune va jin blis co rovodanteyar... voxen nope toki vratinyi va rin batlize co rojovlé, me co rototcel... Tcerkesik va rin konaritid. Gan Lorik zo esteted !! Ko kotrafa vema al plewed, dace koe wida yon tigid. Kal tokcoba batcoba statar, Lorik ? Batliz fu kalvilad... va min dum wil fortéyasitid.

Voxen... mea rodefabdulanil ! ~ ina saason loplekur.

Nubanubon deayason va zelt, va yikye kan ma koanamar, pomatason va ticlanira. Sin va aludevafo aalxo loon istlanid. Reme aalgapuxa, kelt turaltadukawer numen va dank ke wilye koe Tcelopek rosolgilded, bitejeem tuzwawer isen afiz toz dur. Ware lanickisu bartivamu co gotir, voxen golde lanigansa ke kimtye, lo toloy bartiv kal wida fiste titid. Guazya tir guyapafa, va ine co djukuburer.

Anamdisukeyeson, ine kalir :

— To afiz...

— Goxe... Abdi bartivars me artlanitit... ~ ayikya prejar.

Amlitason wan abdulaniid. Va pudamam gildecked. Guazya ve vukir.

— Lexe, nazbeye, arkane gonaskit !!

— Va tokcoba dragel, gadya ? ~ yikye wesidon kalir, to ine torigise va bata diveikya gu kon gadik, i gu vuwik, i gu giwatas kumaskisik.

— Koe aalxo kali siel zavzagil !! Moi miel dimlanití aze batlize keté... koe bato xo, aze ko jinafa mona preyutatá...

Yikye doster da batcoba vode gotir, azen guazya isker, dimzilison va zelt.

Ba illanira, Iliitsa va nuba ke velik uzar nume kizoyur :

— Pintye ! Kimtafe pintye... Al awalker ! Nubeem tir

fenterses.

Yikye kirepton rwoder aze ve vukir. Kranavera ke guazafa tawadayikya romplekupur numen ine va yona vinusa ewa giopon aneyar. Anton gildar da va kona grelera ke kintikya dem sollipana gloga mea rovoker.

— Pintye, pintye... ~ ina brer, xowason va bliiskaf tisikam.

Konten is burdaf, jovleson va kota pokolera, vintesik va aalxo istlanir.

Kan puda kotrafa gu ikuza, Iliitsa iegar :

— Va int preyutanyal, nazbeye !! Dimlanití, ba siel !

Azon, kaliaboron mo binka griawir.

VI

Taneafa olya ke awalt biwe su remrud viele tic vawa varafa rumala dem turkik moe okol levgon awir, azen teniskafa sipuxa dem nugervolia. Okolsayakik is nugasayakik va omega ke Iskar fure artlanid lize vukid.

Nugervoliafa lospa va bar-decemoy olkik icle dadir, Abdulaniyinin gan jontik ervokirapaf Bacibuzuk sayakik. Arak, to tel sartayap, tir dem tcerkesik diskis va gedrapafo ervo. Okolervoliik, azavzason va okol, isked da tcerkesaf blay di kabduolapir.

Bat volmilidaf loras milkap tir dem vartajaf Djambalast

wetce okilik, i udutaf is forteyfamaſ tcerkeſaf drendik. To in, darevielon, va xakes vintes okilik viltason al atar, i va Botev.

Djambalast va okol titlanir, lente aalxo, pake rawaks ke grostanafa guazafa uja. Talte uja dzeta ke meroturpen pistok vamoe ecorap madawed. Roneon, taya ke Tcelopek is caldafa matela divatcewed, do caneon yon guraf pistok dem lebafa vokliba. Koe senta vanmieae aal va tanafo bonolsusikafo wico solwit, i va wico re jovleyeno gan pilkotik.

Kot iteem va aludevafo is amlitaso aalxo modisuker, lize jotaf vintesik va int preyutar. Voxen va volto in bat ayik koaneyad, anamgildeyeson da lana artowasa lospa ke Balkan ba afiz ko aalxo va int fu pler, remlanitison va Iskar az gelbeteson ko Stara Planina.

Iwazanon gan darevielafa cenera, sayakik va parmafa dirgara ked edje Djambalast is anameon konak Bacibuzuk okilik icde dilfus azed va sint kuljed. Tir mon balemsandaf ayik, beretrapaf is ontinaf, dem ebeltaf lukast, diskis va tcerkeſaf aboz dem moavukaf pasioleks is ervokirarsaf. Inaf remrus itapeem, dem jemakaf is udutaf disuk, leve ontinaf tcerkeſaf gomap orikon jeber.

Batvulackon, viltara va wico malstir, arstakseweson dum gleba, pistokpistokon.

— Vintesik ! Vintesik ! ~ sayakik iegad.

Kottan van wico rwoder voxe va derdon ticstis vikizam divburen gan gazdafa upa anton wir. Abicedje, ciwarsan num titicken, sin me liziwed, azen pelkafa basvajotera va aalxo

vanvilar.

Laizon, rem vikizap, puda tauled :

— Djambalast su luber !

Tire Djambalast su dimeluber, putcegason va forteyora. Tanoy vilt malnis va wico ko ast al tazecker.

Dum koafima baliyf warzot vanmia ema divgolewer... sipuxa lipawer, kottan otceper. Wiluon kaimpayason va alto ke okilik, okolervoliik tcepason griawid, voxen kou aalxo meka direfa viltara al sokir.

Vamoion, viele tcerkesik kan amlit kotlize gasas rosonked da vintesik ko meftava ape al gelbed, pune konak ayik ko aalxo laxulaited. Valeve persa va senyesa awalkoda ke vintesik trasid. In biwe barsandafe ayikye tir, dem ebeltaf lukastap is bakayan nimat gasupeyen gu felay. Tcerkesik va int robuived da kot vintesik al otcer.

(Radimi surtera va Botev, ki ke inafa lospa, oton gu mon balem-sana, nyapenon gan Pera budik ko meftava al gelbeyer, i gan ayik dem alto batlize trasiyino. Mielcekon koe aludevafo aalxo xuyavon al kraber aze cukuncayan is aelawalkes is poiskaf, poke Tcelopek al komoder, mesonkeyeson da volnik va inafa dimavlara al levwid.)

Eglus vilt va laspedafa Pera xuyavon al balier. Mekar kosik batlize tigrir. Wori, viele tcerkesik va wico kolanid, va mezekas ayik trasid.

— Gertik ! Vintesik ! ~ akoydanon diviegad.

Lukastiskafe yikye moe sid dayker, ton taka nokodayana gan vilt. Va tucpastikaf gem tiskir, i va gem dem kavlepeyeni bopi isker da tantazukot ke vintesik zo wir, i tantazukot bediblayan gu fortrey. Kan bakaks tuebeltayan gan goa, rabatecket da ine ape al kser, kaikida va Djambalast pisonason viltayar. Voldum gubeuca, tcerkesik va awalkoda me bastakad inde gilaskid, kougason va taka ke vintesik gu nuk, dum despert, sugdon gu cenera. Va wico anton koanteyad, jovleson va xonukeyes tucpastik. Viele bak sielcek turkafa lospa va san-baroy vintesik laxumallanis va meftava ta remlanira va Iskar di staker, bam vikiz va empaxa ke rabetaf veveduks wan divstir.

Guazafa Iliitsa jontikedje al awalker. Voxen inaf ilblis velik buren ko tucpastaxo al moblir. Re tir ontinaf listaf yik pokiraf is godjaf, yoltkiraf gu P- Mayor. Kotviele veygadikya va bat bifeem kareizuyur, pune dun lopekuyur da inafa griakolera va grutciafa is kotaskina blikera ke noglotaf tucpastik me daneyer voxen ina sotrakuyur da to grableteson va kumaskira tove kimtaf vintesik, Lorik va bli pu velik al kozilir.